



Borgarráð Reykjavíkur

Tjarnargötu 11
101 Reykjavík

Samræming úrgangsflokkunar á höfuðborgarsvæðinu 2020 - 2024

Hér með sendist útskrift út gerðabók umhverfis- og heilbrigðisráðs frá 16. febrúar 2022:

Lögð fram umsagnarbeiðni skrifstofu borgarstjórnar, dags. 28. janúar 2022, þar sem óskað er eftir umsögn umhverfis- og heilbrigðisráðs varðandi samræmingu úrgangsflokkunar á höfuðborgarsvæðinu. Einnig er lagt fram bréf Samtaka sveitarfélaga á höfuðborgarsvæðinu, dags. 20. janúar 2022, ásamt fylgigögnum og umsögn umhverfis- og skipulagssviðs dags. 11. febrúar 2022.

Ráðið tekur undir umsögn umhverfis- og skipulagssviðs, skrifstofu umhverfisgæða.

Vísað til borgarráðs.

Fulltrúar Vinstri grænna, Samfylkingarinnar, Pírata og Sjálfstæðisflokksins leggja fram svohljóðandi bókun:

Við sjáum fram á gerbreytta úrgangsstjórnun á höfuðborgarsvæðinu og það er mikilvægt að vel takist til við innleiðingu hennar. Betri flokkun og hreinni straumar er umhverfis- og loftslagsmál og sveitarfélögin þurfa að gera íbúum það auðvelt og auðsótt að flokka í fleiri strauma. Nú stendur til að safna lífrænum efnum, pappír og pappa, plastumbúðum og blönduðum úrgangi við heimili. Einnig verður grenndarstöðvakerfið styrkt, þétt og samræmt og þar verður safnað gleri, málum, textíl og skilagjaldsskyldum umbúðum. Með samræmingu sorphirðu á höfuðborgarsvæðinu er stigið risastórt skref í umhverfismálum og í umhverfisvitund fólks enda er innleiðing hringrásarhagkerfisins og að ná betri tókum á úrgangsstjórnun liður í því að stemma stigu við loftslagsbreytingum af mannavöldum. Nýja kerfið er í samræmi við lagabreytingar um söfnun á úrgangi við heimili sem taka gildi um áramótin og hefur mikil og fagleg vinna átt sér stað við vinnslu tillagnanna sem hér hafa verið kynntar. Samtakamáttur sveitarfélaganna og skýr markmið hafa fært okkur nær hringrásarhagkerfinu. Er öllum sem komu að þessari vinnu færðar miklar og góðar þakkir.

Fulltrúi Miðflokksins leggur fram svohljóðandi bókun:

Ungmennaráð Kjalarness lagði fram tillögu í borgarstjórn um söfnun lífræns sorps á sameiginlegum fundi ráðsins og borgarstjórnar. Tillagan var samþykkt í umhverfisráði og var farið af stað með tilraunaverkefni á Kjalarnesi. Nú nokkrum árum seinna er verið að innleiða samræmdar reglur í sveitarfélögunum á höfuðborgarsvæðinu. Loksins – velkomin í nútíðina Reykvíkingar það er komið árið 2022. Þeim sem stjórna Sorpu bs. er á engan hátt treystandi fyrir sorpmálum höfuðborgarinnar. Gaja átti að kosta 2 milljarða og stendur nú í 6 milljörðum. Endanlegur kostnaður liggur ekki fyrir. Þá er gefið í – þessir sömu „snillingar“ hafa nú á þrjónunum að reisa hátækibrennslu upp á 20-35 milljarða. Jú, jú það nefnilega gekk svo vel hjá þeim að reisa GAJA verksmiðjuna. Það er verið að taka Sorpuleiðina á málið – að hafa hana sér íslenska í stað þess að sækja þekkingu erlendis þar sem hátækibrennslustöðvar hafa þegar verið reistar. Það er ekki annað hægt en að fá hroll við tillugsunina.



Reykjavíkurborg

Friðrik Klingbeil Gunnarsson ráðgjafaverkfræðingur og Jón Kjartan Ágústsson frá Samtökum sveitarfélaga á höfuðborgarsvæðinu taka sæti á fundinum undir þessum lið með rafrænum hætti.

Virðingarfyllst,

Erna Hrönn Geirsdóttir

Umhverfis- og skipulagssvið

Skrifstofa stjórnsýslu og gæða

Fylgiskjal: umsögn umhverfis- og skipulagssviðs dags. 11. febrúar 2022.

Umhverfis – og heilbrigðisráð Reykjavíkurborgar
Borgartúni 12-14

105 Reykjavík

Reykjavík, 11. febrúar 2022
USK22010136

Efni: Umsögn Umhverfis- og skipulagssviðs Reykjavíkurborgar um tillögu starfshóps um á samræmingu úrgangsflokkunar á höfuðborgarsvæðinu

Fyrir fundi umhverfis- og heilbrigðisráðs liggur umsagnarbeiðni skrifstofu borgarstjórnar, dags. 28. janúar 2022, um tillögu starfshóps á vegum samtaka sveitarfélaga á höfuðborgarsvæðinu um samræmingu úrgangsflokkunar á höfuðborgarsvæðinu. Eftirfarandi er umsögn skrifstofu umhverfisgæða um tillöguna.

Í tillögu starfshópsins er að finna nánari útfærslu og kostnaðarmat á tillögu að samræmdu flokkunarkerfi fyrir höfuðborgarsvæðið. Tillagan gerir ráð fyrir flokkun í 4 flokka við húsvegg (pappír/pappi, plast, lífúrgangur og blandaður úrgangur). Rekið verði net grenndarstöðva með gámum undir gler, málma, textíl og skilagjaldskyldar umbúðir. Einnig verði nokkrar stærri stöðvar þar sem einnig verði gámar undir pappír og plast undir magn sem kemst ekki fyrir í sorptunnum við hús. Tillagan samræmist nýgerðum breytingum á lögum nr. 53/2002 um meðhöndlun úrgangs (innleiðing hringrásarhagkerfis).

Endanlega tímalína innleiðingar einstakra sveitarfélaga liggur ekki fyrir enda sveitarfélögin ólík að stærð, öll sveitarfélög utan Reykjavíkurborgar þurfa að ná samkomulagi við verktaka um þjónustu við verkefnið. Reynt verður að samræma megin vörður verkefnis eins og kostur til að nýta best sameiginlegt kynningar- og fræðsluefni fyrir verkefnið og miðlun á því, sem Sorpa mun sinna framleiðslu á. Mikilvægt er að starfshópur sveitarfélaganna starfi áfram og stýri og innleiðingu verkefnisins ásamt Sorpu og vinni áfram að sameiginlegum verkefnum í úrgangsstjórnun sveitarfélaganna.

Í kerfinu er sveigjanleiki til að mæta fleiri flokkum við hús án þess að endilega þurfi að fjölga ílátum. Notaðar verða tvískiptar tunnur undir blandaðan úrgang og lífúrgang við einbýli, raðbýli og minnsta fjölbýlið. Sem dæmi þar sem eru í dag 3 tunnur við hús verður grátunnu skipt út fyrir tvískipta tunnu og heildarfjöldi óbreyttur. Tvískiptar tunnur verða einnig í boði fyrir pappír og plast og þar sem það á við. Ílátum mun því aðallega fjölga þar sem ekki hefur verið ílát fyrir flokkaðan úrgang fyrir, en líklegt er að þar megi fækka tunnum undir blandaðan úrgang á móti.

Í fjölbýli verða áfram hefðbundnar tunnur og ker. Úrgangur færist milli íláta, þ.e. hægt verður að fækka ílátum fyrir blandaðan úrgang þegar flokkunarílátum fjölgar. Sorpgeymslur í fjölbýli eru margar af ófullnægjandi stærð og munu ekki rýma öll ílátin sem þarf. Því er áformað að auka hirðutími



endurvinnsluefnis úr hirðu á 21. dags fresti þannig hún verði á 14. daga fresti eins og hirða blandaðs úrgangs er í dag.

Innleiðing í fjölbylí hefst á árinu 2022 en dreifing tvískiptra tunna snemma árs 2023. Vonast er til að ljúka innleiðinu í öllum hverfum haustið 2023. Hirðutiðnin verði aðlöguð samhliða innleiðingu.

Aukin flokkun við heimili, breytt hirðutiðni og rekstur nýs kerfis kallar á fjárfestingar í ílátum, bílum og eykur umfang í rekstri sorphirðunnar. Kaupa þarf nýja bíla sem geta tæmt tvískiptar tunnur, sem gerist við nauðsynlega endurnýjun bílaflotans. Fjölga þarf starfsmönnum hirðunnar til að mæta fjölgun íláta í borginni og aukna hirðutiðni endurvinnsluefnis. Auk þess er tæming tvískiptra ílátra að lágmarki 30% tímafrekari en hirða hefðbundinna íláta. Tillögurnar gera ráð fyrir því að íbúar noti pappírspoka sem sveitarfélögin skaffa til að nota undir lífúrgang og ákveða þarf fyrirkomulag þeirrar dreifingar.

Á meðan á innleiðingu stendur þarf að ráða starfsfólk tímabundið og til að vinna að samsetningu, merkingu og dreifingu íláta eða kaupa þá þjónustu af söluaðila. Einnig þarf að ráða tímabundið starfsfólk eða kaupa þjónustu til að sinna heimsóknum til heimila samhliða innleiðingu í hverfum og kynna nýja flokkun og síðar til að sinna eftirfylgni með fræðslu þar sem flokkun er ekki fullnægjan.

Í undirbúningsfasa þarf að gera breytingar á samþykkt um meðhöndlun úrgangs vegna innleiðingar á kröfum laga um hringrásarhagkerfisins og eins breytingar og útfærslur á gjaldskrá sorphirðu. Ný löggjöf heimilar að kostnaður sé færður á milli úrgangsflokka, þ.e. hægt að er færa kostnað vegna endurvinnsluláta að talsverðu eða öllu leyti yfir á ílát fyrir blandaðan úrgang.

Með samræmingu úrgangsflokkunar á höfuðborgarsvæðinu er stigið framfaraskref í úrgangsstjórnun á svæðinu sem muna einfalda og auka flokkun úrgangs frá heimilum á svæðinu og efla innleiðingu hringrásarhagkerfisins.

Því er lagt er til að viljayfirlýsing um samræmingu úrgangsflokkunar verði undirrituð.

f.h. umhverfis- og skipulagssviðs Reykjavíkurborgar

Friðrik Klingbeil Gunnarsson

Friðrik Klingbeil Gunnarsson,
skrifstofa umhverfisgæða